


Fulan Outubru 2013

SDB no FMA

HAFUTAR AN HO KÓR KSOLOK NIAN

Oratóriu iha Tímor: Uma fiar nian



Ho ita-nia sasin no ho domin ne'ebé ita iha, ita lori esperansa, ne'ebé fiar fó mai ita, ba mundu ida ne'e. (Mensajen ba Loron Mundiál Missaun nian)



ATIVIDADE síra

Istória misionária

Iha irmán Salesiana barak, irmão no padre salesianu barak ne'ebé sai misionáriu (Amo Papa Bento XVI iha tinan kotuk foti sr. Maria Troncatti nu'udar beata, nia sai misionária iha Ecuador): ita bele buka sira-nia istória badak ruma atu haktuir ba oratorianu sira, ka atu reprezenta hamutuk ho sira, liuliu haree oinsá sira bele moris ho ksolok hodi haklaken Evanjellu maski hasoru difikuldade oinoin.

1



2 Ha'u fiar... Tan ne'e ha'u mak misionáriu

Oratorianu ruma (ez. iha Fuiloro) halo ona esperiênsia misionária, oinsá foin-sa'e sira bele haklaken Evanjellu ba família sira no ba sira hotu ne'ebé sei dook husi Kreda. Tansá la bele repete esperiênsia ida ne'e ho preadolexente ka labarik sira?

Bele prepara sira hodi lee parte ruma (liuliu n. 1) husi Amo Papa nia mensajen ba Loron Mundiál Missaun nian, hafoin sira bele forma grupu ki'ik oan no sira bele liu husi família ida-idak hodi konvida sira ba Missa iha Loron Misionáriu Mundiál.

Saida mak preziza

Bele husu ba oratorianu sira atu halo lista ho buat ne'ebé misionáriu ida preziza atu hala'o ninia knaar no buka atu lori sasán ruma. Ba materiál ida-idak sira tenke esplika tansá hili ida ne'e no preziza atu halo saida.

Ikus nian, animadór sira bele fó valór ba buat ne'ebé oratorianu sira lori, hodi fó hanoin katak, iha Evanjellu (Kf Mt 10), Jezús konvida eskolante sira atu lori de'it buat ne'ebé esensíal. Tan ne'e, fó valór aas ba sasán hanesan Evanjellu, Livru orasaun nian, tersu nst; no fó valór ki'ik ba buat ne'ebé sosiedade dada atu ema hotu iha (Hp, computer, Ipod, kareta jetu nian...)

3



FILME

Iha filme ruma, ne'ebé ladún foun, kona-ba misaun:

The other side of heaven: maski protestante, filme ida ne'e hatudu didi'ak ligasaun entre Maromak nia Futar Lian no haklaken ba ema hotu hodi fahe sira-nia esperiênsia

Molokai: the Story of fr. Damien : hatudu oinsá Jezús nia evanjellu la'o hamutuk ho karidade konkreta no liuhusi misionáriu sira, Maromak fahe ema nia terus no susar...

Maibé se hakarak hatudu filme ruma badak, "Misioni Don Bosco" haruka beibeik ba comunidade sira dvd kona-ba moris iha rai missaun; bele hili ida no hatudu ba oratorianu sira hodi husu ba sira atu deskobre karakteristika sira ne'ebé misionáriu ida tenke iha. Bele mós hatudu Amo Papa nia omelia iha Rio loron 27 jullu, tanba ba Loron Mundiál Foin-sa'e sira nian ho títulu: "Imi ba, no halo povu sira sai ha'u-nia eskolante sira".



JOGU

BA RAI MISAUN (di'a liuk halo jogu ida ne'e iha liur)

Jogu ida ne'e hanesan “kontenidór”, katak iha ninia laran iha jogu ruma tan: jogu ida-idak uza nu'udar título verbu ida ne'ebé apresenta atitude misaun nian. Bele uza jogu hotu no bele hili ida ka balun de'it.

Oratorianu sira sei tuir jogu sira ne'e nu'udar grupu.

Objetivu: haruka misionariu sira ba rai liur. Liuhusi jogu sira ne'e sei manán pontu ne'ebé sei fó possibilidade atu haruka misionariu ida ka sira iha rai ne'ebé grupu hili.

Materiál: mapa ida mundu nian no sinál ho forma ema nian ho kór la hanesan ba grupu ida-idak.

Haklaken: pergunta sira; surat-tahan ida ho lapis ba grupu ida-idak.

Ba: balde ida ba grupu ida. Fatuk sira iha ne'ebé hakerek: domin, ksolok, egoizmu, kolaborasaun, baruk, aten-barani, laran-moras, laran makerek, konfiansa, halo an.

Entrega an: botir ida ba grupu ida-idak

Tulun/gia: hena ida ba oratorianu ida-idak husi grupu ida atu taka ninia matan

Fahe: kesi kabas ka tali rafia naruk ba kanuru ida.

Bainhira grupu ida iha ona pontu 3, nia bele haruka misionariu ida iha ne'ebé nia hakarak. Tan ne'e, entre jogu ida no ida fali, bele hein uitoan hodi haree se grupu ida iha ona misionariu no grupu sei haruka ba kontinente ida ne'ebé. Bainhira grupu ida iha ona misionáriu 3 iha rai ida, nia bele hari'i uma Kreda ida.

HAKLAKEN:

Misionáriu loos haklaken Jezús no evanjellu, tan ne'e, molok ba rai missaun tenke hatene didi'ak Jezús. Bele uza pergunta ne'ebé tinan kotuk ekipa PJ prepara kona-ba Evanjellu, no mós buat ne'ebé uluk Infansia Misionária fó. Presiza prepara pergunta 10.

Grupu sira sei la hatán ba pergunta hodi hakilar, maibé sira sei hakerek resposta iha surat-tahan. Hato'o ona pergunta 10, animadór sira sei foti grupu ida-idak nia surat-tahan hodi sura resposta loos hira. Grupu sei simu pontu 1 ba resposta loos ida.



BA:

Misionáriu ne'ebé hakarak ba hodi lori Jezús tenke halakon atitude sira ne'ebé negativu no la la'o ho Jezús nia liafuan sira.

Iha grupu laran, fahe oratorianu sira ba na'in 2 ka na'in 4 (konforme se sira barak ka lae) no sira sei forma liña iha balde nia kotuk. Dook metru 20 husi sira, tau sinál ida: grupu ki'ik sira sei halai husi sira nia fatin to'o sinál, iha ne'ebá sira sei hili fatuk ida ho atitude ne'ebé la suporta espíritu misionáriu, tuir sira-nia hanoin. Hafoin sira sei halai fali ba sira nia fatin hodi fó balde ba grupu ki'ik seluk. Sira ne'e sei halo tuir buat ne'ebé kolega seluk halo ona no sei kontinua to'o bainhira, tuir grupu nia hanoin, fatuk ne'ebé iha balde laran espresa atitude loos sira atu sai misionáriu. Grupu ne'ebé hotu uluk no halo loos, sei manán pontu 3, tuir mai grupu seluk manán pontu 2 no grupu ida tan pontu 1.

ENTREGA AN

Tuir dalan missaun nian, misionáriu presiza konfia la'ós iha ninia an rasik de'it, maibé liuliu saran nia moris iha Maromak nia liman. Bainhira ita entrega an ba ema seluk, ita bele halo esperiénsia ki'ik oan ruma kona-ba saran an.

Fahe grupu ida-idak ba grupu ki'ik ho ema na'in 3; sira ne'e, na'in ru sei fó liman ba malu hodi forma kadeira ida, no ida fali sei tuur iha sira-nia liman. Grupu sira sei hamriik iha fatin hanesan jogu “Ba” no iha ne'ebé uluk marka sinál, oras ne'e tau botir ida.

Bainhira jogu hahú, grupu ki'ik oan (hodi tsu liman hanesan foin esplika) halai to'o botir no iha ne'e sei haleu botir hodi fila ba sira-nia fatin. Hafoin, to'o sira-nia fatin, sei halo grupu ki'ilk oan seluk tama hodi basa sira-nia liman.

Presiza sukat tempu atu hatene grupu ne'ebé halai liu; maibé se grupu ki'ik oan ida monu, ka hahú halai bainhira grupu seluk seidak tama, ka sira ne'ebé halo kadeira haketak fali; maski grupu ida ne'e halai maka'as, nia sei la simu pontu. Ida ne'ebé halai maka'as liu manán pontu 3, tuir mai grupu seluk manán 2 no grupu datuluk manán pontu 1.

TULUN/GIA

Lori Maromak nia Futar Lia ba ema seluk katak tulun ema sira atu hetan dalan, gia sira.

Grupu ida-idak prepara an hodi halo fileira: oratorianu ida tau liman iha kolega ne'ebé hamriik iha nia oin nia kbaas. Ida ne'ebé iha oin gia grupu tomak, tan ne'e tenke taka sira seluk nia matan ho hena ida. Tau obstakulu ruma (fatuk, bola...) iha dalan ne'ebé grupu tenke halo no sura tempu ne'ebé grupu presiza atu halo dalan ne'ebé marka ona. Se, bainhira la'o, ema ruma haketak husi kolega seluk, ka hasai hena husi matan, ka sala dalan, grupu sei simu pontu. Grupu ne'ebé uza tempu badak liu sei manán pontu 3 tuir mai grupu seluk manán 2 no grupu datuluk manán pontu 1.

FAHE

Misionáriu mak ema ida ne'ebé hatene fahe buat hotu ne'ebé nia simu.


Membru grupu ida-idak nian, hamriik hodi fó sorin ba malu. Ida ne'ebé uluk kesi tali ka kabas ba ninia liman, hafoin halo kanuru tama iha faru nia liman no sai husi sorin. Ida ne'ebé hamriik besik nia sei simu kanuru hodi hatama iha ninia faru nia liman no halo sai husi sorin seluk. Membru grupu nian halo hanesan to'o ema ikus ne'ebé hatama tiha kanuru husi faru nia liman sei kesi ninia liman. Hodi kesi malu hanesan ne'e, grupu sei aprezena an ba animadór sira. Grupu ne'eb'e sei aprezena an uluk sei manán pontu 3, ida seluk pontu 2 no ita ne'ebé datoluk pontu 1.



DOMBOSCO nia esperiênsia

Haree katak ha'u presisa ema ruma atu tulun ha'u iha serbisu uma no eskola nian iha Oratóriu, ha'u hahú lori balun hamutuk ho ha'u ... Ha'u halo buat ne'e tuir situaun husi tinan 1841 to'o 1848. Ha'u uza meius oinoin atu hala'o ha'u-nia finalidade partikulár, katak estuda, hatene, hili balun ne'ebé iha atitude no hakarak atu moris hamutuk iha comunidade hodi simu sira hamutuk ho ha'u iha uma.



Ho intensaun ida ne'e mos, bainhira tinan ne'e (1848) atu remata ona ha'u halo esperimentu ida hodi hala'o retiru ho grupu ki'ik ida. Ha'u halibur foin-sa'e besik limanulu iha Oratóriu; sira han hamutuk ho ha'u, maibé tan toba-fatin la to'o, balun toba iha uma hodi fila fali iha dader. Ba uma hodi fila mai lori perigu atu lakon buat ne'ebé sira manán husi konferênsia no instrusaun sira retiru nian. Ami hahú Domingu kalan no remata Sabadu kalan. Resultadu di'ak loos! Barak ne'ebé ba tempu naruk ami haka'as an atu lori sira ba di'ak iha tinan nia laran, sira hahú moris ho virtude. Barak sai relijiozu, no sira ne'ebé moris nu'udar leigu sai modelu iha Oratóriu.



IMAJEN

Kuadru ida ne'e reprezenta Jezús hamutuk ho ninia eskolante dahuluk sira: sira hotu peskadór no sira iha tasi ibun hateke no kumprimenta katuas ida iha bero leten, ne'ebé karik sira-nia aman.

- Hateke ba ema na'in aat nia atitude: sira espresa saida?
- Jezús, ho ninia hahalok, hakarak dehan saida ba sira?



ORASAUN

Iha rai misaun ema barak ne'ebé moris iha funu ka difikuldade nia laran; iha momentu ida ne'e, Kreda tomak reza liuliu ba Siria, maibé iha fatin barak ne'ebé presiza ita-nia tulun, liuhusi orasaun no sakrifisiu. Ita bele prepara orasaun id aba fatin sira ne'e, liuliu atu misionáriu sir abele sai ema damen nian, ne'ebé fó sasin kona-ba Jezús nia domin.